



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Montanario Svbdiacono nostro.

urn:nbn:de:hbz:466:1-20006

confessionem spontaneam eidem Bituricen. Archiepiscopo de veritate negotij constitisset, dictos Archiepiscopos & Episcopum juxta tenorem mandati nostri suspendit. Et quamvis iidem Archiepiscopi Turopen. & Rothomagen. tanquam majores plus excefferint in præmissis, præfatus verò Episcopus minùs, utpote illorum, tanquam majorum, errorem secutus; nos tamen intellecta per literas & per nuntios eorundem Archiepiscoporum confessione spontanea & supplicatione devota, veniam errori dedimus, quia non ex malignitate sed ex simplicitate peccarunt. Et quoniam præfatus Episcopus, qui & minùs peccaverat, & sicut ex præmissis apparet, severiùs fuerat castigatus, ad apostolicam sedem licet spontanea voluntate, non tamen sine multis laboribus & expensis accessit, reatum suum recognoscens, humiliter & devotè misericordiam postulans, & judicium non requirens; nos super facto ejus cum fratribus nostris communiter tractatum habentes, & subtiliter indagantes quòd licet munus sibi consecrationis impensum nec prioris Ecclesiæ ipsum Pontificem fecerit nec secundæ, cum ad primam non fuerit consecratus, & ad secundam, prioris vinculo perdurante, non potuerit canonicè consecrari, adhuc alteri alligatus conjugaliter; illud tamen providè attendentes, quòd & urgens necessitas & evidens utilitas Ecclesiæ vestræ, quoniam non poteratis in aliam personam idoneam convenire, dispensationis gratiam requirebant, eo de plenitudine potestatis tam à vinculo prioris Ecclesiæ quàm à pœna suspensionis penitus absoluto, de benignitate sibi apost. sedis duximus concedendum ut priore consensu hætenus perdurante, sicut per literas personarum Ecclesiæ vestræ nobis est intimatum, Andegaven. Ecclesiæ tanquam proprius Pontifex ad laudem & gloriam nominis Dei, ad honorem & exaltationem ipsius, & ad salutem & utilitatem suam & tam Cleri quàm populi sibi commissi studeat gubernare, ut præveniente divina gratia & sequente plus prodesse velit & valeat quàm præesse; præsertim temporibus istis, quibus cum abundet iniquitas, & peccatis exigentibus multorum caritas refrigescat, opus est non mercenario, sed pastore. Quocirca vobis per apost. scripta præcipiendo mandamus quatenus ipsum

Episcopum tanquam patrem & pastorem animarum vestrarum recipientes humiliter & devotè, reverentiam ei debitam, honorem, & obedientiam impendatis; ut ipse in vobis filialem devotionem inveniat, & vos in eo paternum reperiatis affectum. Datum Laterani XII. Kal. Februarij.

*MONTANARIO SVBDIACONO nostro.

CVM super Prioratu sancti Savini de Plano Spoleti inter te & Philippum Iohannis Pelagalli quæstio verteretur, & ob hoc ad sedem apostolicam venisset, dilecto filio nostro G. sancti Adriani Diacono Cardinali causam ipsam commisimus sine debito terminandam; in cuius præsentia quòd Prioratus ipse ad te pertineret probare per electionem canonicam satagebas; cum à Canonicis ipsius Ecclesiæ primò fuisses electus, qui ab annis quinquaginta Priores in dicta Ecclesia sine contradictione qualibet elegerunt. Verùm præfatus Philippus, quòd idem Prioratus sibi potius deberetur, ea nitebatur ostendere ratione, quia per venerab. frat. nostrum Matthæum Spolet. Episcopum ibidem fuerat institutus, ad quem institutionem ipsam spectare firmiter asserbat. Ad hæc ergo probanda testibus utriusque patris receptis, & eorum depositionibus publicatis, cum super eis sufficienter esset utrinque, prout jus expostular, disputatum, antequam definitiva sententia proferretur, præfatus Cardinalis pro Ecclesiæ negotiis fuit à nobis in regnum Siciliæ destinatus, in cuius locum substituvimus dilectos filios nostros Augonem sancti Eustachij & G. sancti Nicolai in carcere Diaconos Cardinales. Qui cum, rationibus & allegationibus partium diligenter inspectis, & de causæ meritis habita notitia pleniore, quæ præmissa sunt nobis fideliter retulissent, quia constitit nobis, per confessionem etiam præfati Episcopi, quòd dictus Philippus in præscripta Ecclesia per eum non fuerat institutus, tibi adjudicavimus ipsius Ecclesiæ Prioratum, ab impetitione præfati Philippi, cui super quæstione præmissa silentium perpetuum imposuimus, re sententialiter absolventes. Nulli ergo &c. nostræ diffinitionis &c. Datum Laterani X. Kal. Februarij.

PETRO

* In cod. MS. Caler. MONTANO. Epist. 111. Ipsi Prioratum sancti Savini, ad quem electus erat, constituit.